



**2022-2**

17. maj 2022

All. nr./notatnr.:  
2021-302-0001-23  
Sull./sagsbeh.: MS/jh

**Soraarnermi ajunngitsorsiat pillugit allagaatinik paasitinneqarumalluni qinnutigisap itigartinneqarnissaanik kommunip aa-lajangiinera isorisarialik**

*Tusagassiortup A-p aningaasat kommunimi pisortaanerusimasumut B-mut taassuma kommunimi atorfimminit soraarneranut atatillugu tunniunneqartut pillugit allagaatinik paasitinneqarumalluni kommunimut 28. juli 2021-mi qinnutigaa.*

*Kommunip allagaatinik paasitinneqarumalluni qinnutigisaq taanna 3. august 2021-mi itigartippaa.*

*Kommunip itigartitsinera A-p Ombudsmandimut 18. august 2021-mi naammagittaalliuutigaa.*

*Ombudsmandi isumaqarpoq kommuni allagaatinik paasitinneqarumalluni qinnutigisamik 28. juli 2021-meersumik paasitinneqarsinnaatitaaneq pillugu inatsimmi § 2, imm. 3, § 12, imm. 1, nr. 1 imaluunniit § 13, imm. 1, nr. 6 tunngavigalugit itigartitsissutiginnissinnaanngitsoq.*

*Ombudsmandi taamatuttaaq isumaqarpoq kommunip aalajangiinermut 3. august 2021-meersumut tunngavilersuutaa amigaateqartoq, tassami*

- *kommunip aalajangersagaq aalajangiinerminut tunngavigisani erseqqissumik innersuussutigisimanngimmagu,*
- *kommunip soraarnermi ajunngitsorsiassat pillugit paasissutissaq paasissu-*

*tissatut misikkarissutut/ersertuussassatut sooq isignerini nassuiarsiman-  
ngimmaq aamma*

- *aalajangiineq kommunip isumaliutersuutigisimasarpiaanik takutitsisuun-  
ngimmat, kommunimi Ombudsmundimut oqaaseqaatimin arlalinni pissut-  
sit aalajangiinermi eqqaaneqarsimanngitsut oqaatigimmagit.*

*Ombudsmandi oqarpoq kommunip aalajangiinera ataatsimut isigalugu isorisa-  
rialiusoq.*

*Taamaattumik suliaq kommunip suliareqqissagaa Ombudsmandip inassuti-  
gaa.*

*(Oqaaseqaat 17. maj 2022-meersoq, tak. j.nr. 2022-302-001-21)*

## **1. Suut misissorpakka?**

**1.1.** Aningaasat B-mut taassuma kommunimi atorfimminit soraarneranut atatil-lugu tunniunneqartut pillugit allagaatinik tusagassiortup A-p allagaatinik paasit-in-neqarumanerata 28. juli 2021-meersup itigartinneqarnissaanik kommunip aala-jangiinera 3. august 2021-meersoq misissorpara.

Kommunip allagaatinik paasitinneqarumanermik qinnutigisap paasitinneqarsin-naatitaaneq pillugu inatsimmi § 2, imm. 3 tunngavigalugu itigartinneqarnissaanut tunngavilersuutaa kommunillu allagaatinik paasitinneqarumanermik qinnutigi-sap paasitinneqarsinnaatitaaneq pillugu inatsimmi § 12, imm. 1, nr. 1 aamma § 13, imm. 1, nr. 6 tunngavigalugit itigartinneqarnissaanut periarfissatut allatut taasai isummerfigaakka.

Matumanit Inatsisartut Ombudsmandiat pillugu Inatsisartut inatsisaanni nr. 7-imi, 1. juni 2017-imeersumi (matuma kingornatigut Ombudsmandi pillugu inatsimmik taaneqartartussami) § 14, imm. 1 innersuussutigaara, tassuunalu aalajanger-sarneqarpoq naammagittaalliuut misissuinermik aallartitsinermut pissutigissal-lugu naammannersoq Ombudsmandip aalajangissagaa.

**1.2.** Ajornartorsutinik taamaattunik siusinnerusukkut nammineq suliarinnissi-manngikkaangama Danmarkimi atuakkiaasimasut aamma Folketingip Ombuds-mandiata periaasia oqaaseqaatinni arlalitsigut aallaavigisarpakka. Kalaallit Nu-naanni inatsiseqartitsinikkut tunngaviusup Danmarkimilu inatsiseqartitsinikkut tunngaviusup pingarnerusutigut assigiinnerat tamatumunnga pissutaavoq. Ka-laallit Nunaanni inatsiseqartitsinikkut tunngavik Danmarkimi inatsiseqartitsinik-kut tunngavimmit allaasoq isumaqaraangama tamanna oqaatigisarpara.

Oqaaseqaatiga imatut tulleriinnilerneqarpoq:

- Immikkoortoq 2. Suliap naatsumik allaaserineqarnera
- Immikkoortoq 3. Inatsiseqartitsinikkut tunngavigisaq
- Immikkoortoq 4. Kommunip isumaa
- Immikkoortoq 5. Uanga naliliinera
- Immikkoortoq 6. Eqikkaalluni inerniliineq

Oqaatigaara suliap ingerlasimanerata allaaserineqarnera oqaaseqaammut tul-liummat.

## **2. Suliap naatsumik allaaserineqarnera**

Aningaasat B-mut taassuma kommunimi atorfimminit soraarneranut atatillugu tunniunneqartut pillugit allagaatinik paasitinneqarnissani A-p kommunimut 28. juli 2021-mi qinnutigaa.

A-p suliami allagaatinik paasitinneqarumalluni qinnutigisaa kommunip 3. august 2021-mi itigartippaa.

Kommunip itigartitsinera A-p uannut 18. august 2021-mi naammagittaalliuuti-gaa.

## **3. Inatsiseqartitsinikkut tunngavigisaq**

### **3.1. Allagaatinik paassisutissiisarneq**

Suliani sulisunut tunngasuni allagaatinik paasissutissiisarneq paasitinneqarsin-naatitaaneq pillugu Inatsisartut inatsisaatigut nr. 9-kkut, 13. juni 1994-imeersukkut (matuma kingornatigut paasitinneqarsinnaatitaaneq pillugu inatsimmik taaneqartartussakkut), paasitinneqarsinnaatitaaneq pillugu Inatsisartut inatsisaata allanngortinneqarneranik inatsikkut nr. 1-ikkut, 31. maj 1999-imeersukkut (sulisorineqartut pillugit paasissutissanik paasitinneqarsinnaanermut tunngasukkut) allannguuteqartinneqarsimasukkut aalajangersaavagineqarpoq.

### **3.1.1. Paasitinneqarsinnaatitaaneq pillugu inatsimmi § 2**

Paasitinneqarsinnaatitaaneq pillugu inatsimmi § 2, imm. 2-kkut 3-kkullu makku aalajangersarneqarput:

“**§ 2.** [...]”

*Imm. 2. Aammattaaq sulianut pisortani sulisunik atorfinititsinernut imaluunniit pisortani atorfinnut qaffasinnerusunut qaffatsinneqarnernut tunngasunut inatsit atuutinngilaq, § 6-imi aalajangersagaq eqqaassanngikkaanni. Tamanna paasissutissanut inuit ataasiakkaat pisortani atorfekarnerannut tunngassuteqartunut aamma atuuppoq, taa-maattorli imm. 3 aamma § 4, imm. 2 takuuk.*

*Imm. 3. Suliani imm. 2-mi oqaaseqatigiit aappaanni taaneqartuni atorfekartup aqqa, atorfia, ilinniagaqarnera, suliassai, akissarsiai suliamullu atatillugu angalaneri pillugit paasissutissanut inatsit atuuppoq. Aammattaaq pisortatut atorfinni atorfinititsinneqartut eqqarsaatigalugit inatsit suliamut atatillugu mianersoqqussutit iliuuserisallu taak-kuningga sakkortunerusut pillugit paasissutissanut atuuppoq. Taamaattorli tamakku pillugit inaarutaasumik aalajangiinermit ukiuni marlunni taamaallaat tamanna atuup-poq.*

“[...]

Suliani sulisunut tunngasuni allagaatinik paasissutissiisarnermi aallaavik paasitin-neqarsinnaatitaaneq pillugu inatsimmi § 2, imm. 2-kkut aalajangersarneqarpoq. Tassani oqaatigineqarpoq inatsit sulianut pisortani sulisutut atorfinititsinermitt suliffimmilu qaffatsitsinernut tunngasunut atuutinngitsoq. Inatsit inuit ataasiak-kaat pisortani sulisutut atorfekartitaanerinut tunngasuni allani aamma atuutinngilaq.

Atorfinititsineq atorfimmilu qaffatsitsineq pillugit paasissutissiineq soorlu suliat sulisut suliunnaarsinnejnarinerinut, soraarsinnejnarinerinut naalasseriitsuliornerlu pissutigalugu malersuinernut tunngasut nalinginnaasut pineqartunut ilaalersillugit annertusineqarsinnaanngilaq, taamaattumillu suliat taakku paasinneqarsin-naatitaaneq pillugu inatsisip atuuffiani pineqartunut suli ilaatinneqarlutik. Folke-tingip Ombudsmandiata ukiumoortumik nalunaarutaa (matuma kingornatigut FOB-imik taaneqartartussaq) 1998.431 innersuussutigaara.

Ilaatitsinngiffiit arlallit paasinneqarsinnaatitaaneq pillugu inatsimmi § 2, imm. 3-mi taagorneqarput. Oqaatigineqarpoq paasinneqarsinnaatitaaneq pillugu inat-sit atorfeqartitaasup aqqa, atorfia, suliassai, akissarsiaqartitaaneranut tunngasut sulinermullu atatillugu angalasarneri pillugit paasissutissanut atuuttoq.

Inatsimmi § 2, imm. 3 pillugu oqaaseqaatini ilaatigut makku akissarsianut tunngasut pillugit oqaatigineqarput:

“[...]

Aalajangersagaq taanna malillugu siullermik paasissutissat “nalinginnaanerusut” arlal-lit inatsimmi pineqartunut ilaatinneqarput. Tassani pineqartut tassaapput atorfeqartup aqqa, atorfia, ilinniagaqarnera, suliarisartagai, akissarsiaanut tunngasut sulinermullu atatillugu angalaneri pillugit paasissutissat.

[...]

Aammattaaq paasissutissat akissarsianut tunngasut inatsimmi pineqartunut ilaatinne-qarput. Tamanna tunngaviusumik akissarsiaannarnut il.il. atuutinngilaq, aammali qaa-niuttoornersianut, piukkunnaateqarnermut immikkullu suliaqarnermut tapisanut, ta-pisanut immikkut ittunut, **soraarnermi ajunngitsorsianut** soraarnerussutisianullu il.il. atuulluni. Tamatumunnga tapertaliullugu sulinermut atatillugu angalanerit pillugit paasissutissat inatsimmi malittarisassat nalinginnaasut malillugit paasissutissiissutigi-neqarsinnaapput, matumanii ilaatigut angalanermi siumoorutit naatsorsuusiorneqar-tneri ilanngullugit eqqarsaatigalugit. **Kisianni assersuutigalugu tapisanik tuni-neqarneq imaluunniit soraarnermi ajunngitsorsiat pillugit isumaqatigiissute-qarnermi tunngaviusut erseqqinnerusut pineqartunut ilaatinneqanngillat.**

[...]" (Uanga erseqqissaanera)

Inatsisilerineq pillugu atuakkiaasimasuni "tunngaviusut erseqqinnerusut" pillugit ilaatigut makku oqaatigineqarput:

"[...]

Naak suliad sulisunut tunngasut pineqartut paasitinneqarsinnaatitaaneq pillugu inatsisip atuuffiani, taamalu paasissutissiinermi, § 2, imm. 2-mi oqaaseqatigiit aappaasigut ataatsimut ilaatinneqannngikkaluartut inatsit (taassumalu ilaatisinnginnissaq pillugu aalajangersagartai nalinginnaasut) sulisup aqqa, atorfia, ilinniarsimanera, suliassai, akissarsiaanut tunngasut sulinermullu atatillugu angalasarneri pillugit paasissutissanut § 2, imm. 3 tunngavigalugu atuuppoq. [...]

[...]

Inatsisissatulli siunnersuut pillugu oqaaseqaatini oqaatigineqarpoq tapiliineq imaluunniit soraarnermut atatillugu ajunngitsorsiassaqtitsineq pillugu isumaqatigiissuteqarnerit pillugit paasissutissat aalajangersakkami pineqartunut ilaatinneqannngitsut. Tamatuma pissuseqataa isumaginninneq pillugu inatsit tunngavigalugu tapiissutit pillugit aaqqissuussinerit pillugit paasissutissanut, tak. § 12, imm. 1, nr.1, paasissutissanullu tunuliaquaasunut atuutissasoq ilimagineqartariaqarpoq, matumani peqqissuseq pillugu paasissutissat soraarnerussutisiassanillu naatsorsuinerit ilanggullugit eqqarsaatigalugit.

[...]." (Ombudsmandeqarfimmi nutsigaavoq)

John Vogterip atuakkiaani "Offentlighedsloven med kommentarer"-mi pingajasaanik (1998-imi) naqitertinneqartumi quppernerit 100-101 innersuussutigaaka.

Inatsisilerineq pillugu atuakkiaasimasunit makku aammattaaq erserput:

"[...]

Akissarsianut tunngasut pillugit paasissutissani – tunngaviusumik aningaasartat oqaa-tigineqarnerisa saniatigut – paasissutissat qaangiuuttoornersianut, piukkunnaateqar-nermut sulinermullu tapinut kiisalu soraarnermi ajunngitsorsianut soraarnerussutisia-nullu tunngasut pineqartunut ilaatinneqarput. Paasitinneqarsinnaatitaanermi akissar-siat aningaasartaasa amerlassusiat suussusiallu pillugit paasissutissat kisimik pineqar-tunut ilaatinneqarput, tunniussinermulli tunngaviusoq pillugu paasissutissat – matu-mani soorlu soraarnermi ajunngitsorsisitsisoqarnissaanik isumaqatigissuteqarneq ilan-ngullugu eqqarsaatigalugu – aalajangersakkami pineqartunut ilaatinneqaratik.

[...]" (Ombudsmandeqarfimmi nutsigaavoq)

Steen Rønsholdtip atuakkiaani "Forvaltningsret, Retssikkerhed, Proces, Sagsbe-handling"-imi tallimassaanik (2018-imi) naqitertinneqartumi qupperneq 328 in-nersuussutigaara.

### **3.1.2. Paasitinneqarsinnaatitaaneq pillugu inatsimmi § 12, imm. 1, nr. 1**

Makku paasitinneqarsinnaatitaaneq pillugu inatsimmi § 12, imm. 1, nr. 1-ikkut aalajangersarneqarput:

"**§ 12. Paasitinneqarsinnaatitaanermi paasissutissat makku ilaatinneqanngillat:**

- 1) inuit ataasiakkaat inuuneri pillugit paasissutissat, matumani aningaasaqarnerannut tunngasut ilanngullugit,
- [...]"

Paasitinneqarsinnaatitaaneq pillugu inatsimmi § 12, imm, 1, nr. 1-ikkut aalaja-ngersarneqarpoq paasissutissat inuit ataasiakkaanut inuunerinut tunngasut, ma-tumani pissutsit aningaasaqarnermut tunngasut ilanngullugit eqqarsaatigalugit, paasitinneqarsinnaatitaanermi pineqartunut ilaatinneqanngitsut. Isertuussiso-qassappat soqutigisanik pineqartumi oqimalutaasoqarnissaanik piumasaqaate-qanngilaq, taamaallaalli allagaatinik paasitinneqarumalluni qinnutigisami allagaa-tit paasissutissanik inuit ataasiakkaat inuunerinut, matumani aningaasaqarneri-nut tunngasut ilanngullugit eqqarsaatigalugit, tunngasunik imallit paasisaqarf-i-giumaneqarnerat ilanngullugu oqaatigineqarsimassalluni.

Makku paasitineqarsinnaatitaaneq pillugu inatsimmi § 12 pillugu oqaaseqaatinit erserput:

“[...] Ilaatinneqartussaanngitsut inuinnaat eqqissisimatinneqarnissaat namminersortullu inuussutissarsiutitigut soqutigisaat il.il. eqqarsaatigalugit tunngavilersorneqarsi-mapput.

Nr. 1 tunngavigalugu paasitineqarsinnaatitaanermi inuit ataasiakkaat inuunerinut tunngasut, matumani aningaaasaqarnermut tunngasut ilanngullugit eqqarsaatigalugit, pineqartunut ilaatinneqanngillat. Oqaaseq “ataasiakkaat inunneri pillugit” “ataasiakkaat inuttut atugaat”-nut inatsimmi atuuttumi atorneqartumut taarsiullugu atorumaneqarsimavoq. Allannguummi tassani siunertarineqarpoq **killiliinermi aalajangersarneqassasoq ilaatisinnginnissami paasissutissat suut ilaatinneqarsinnainersut, pingaartumik paasissutissat “mianernartuutillugit”, tassa inuiaqati-giinni paasinnittarneq nalinginnaasoq tunngavigalugu tamanit ilisimaneqalernissaasa pinngitsoortinneqarnissaat piumasarineqartariaqarluni**. Oqaaser-tanik allannguinikkut ilaatisinnginnissamut aalajangersakkap atuuffigisinnaasai anni-killiallatsinneqarput.

**Ilaatisinngitsoorsinnaaneq tunngavimmigut paasissutissat qanoq ittuussusiannik ataatsimut isigalugu naliliinermik ilaqtinnejartussaavoq.**

**Pisuni ataasiakkaani isertuussinissaq piumasaqarineqartariaqartoq inatsimi atuuttumisulli aalajangersakkap atorneqarnissaani piumasaqaataavoq.**

Taamaattorli illua’tungaani aamma imaassinjaavoq paasissutissani pineqartup immik-kut erseqqissarsimagaa paasissutissaq taamaattoq inuup inuinnartut eqqissilluni inuu-nissaata illersorneqarneranut ilaatikkusukkini. Pisut tunngavigalugit tamanna paasis-sutissap taassuma aalajangersagaq manna tunngavigalugu ilaatinneqannginnissaanut tunngavilersuutaasinnaavoq. Assersuutigalugu tamanna telefonit normui isertortut inuillu nalunarsorneqarfianni adressit illersugaanerat eqqarsaatigalugit atuuppoq.

[...]" (Uanga erseqqissaanikka)

Inatsisilerineq pillugu atuakkiaasimasuni taamatuttaaq oqaatigineqarpoq aalaja-nersagaq taanna “allagaatini paasissutissanik paasissutissiineq inummut paasis-sutissani pineqartumut ajoqusiisinnaanermik pineqartumi imaqrnerat apequ-taatinngagu atuuttoq”.

Jon Andersenip allallu atuakkiaanni “Forvaltningret”-imi appasaanik (2002-mi) naqitertinneqartumi qupperneq 423 aamma FOB 2005.465 innersuussutigaakka.

Inatsisilerineq pillugu atuakkiaasimasuni aamma oqaatigineqarpoq:

“[...]

Inuup aalajangersimasumik amerlassusilinik aningaa-sartaqartumik pisortanit pisarta-gaqarsimanera pillugu paasissutissaq immini aalajangersagaq tunngavigalugu ilaatin-neqanngissinnaasussaangilaq, paasissutissaq taanna pineqartup nammineq aningaa-saqarniarnera pillugu isertuussassamik arlaatigut saqqummiussisuunngippat.

[...]" (Ombudsmandeqarfimmi nutsigaavoq)

John Vogterip atuakkiaani "Offentlighedsloven med kommentarer"-mi (1992-i-meersumi) qupperneq 187 innersuussutigaara.

Paasitinneqarsinnaatitaaneq pillugu inatsimmi aalajangersakkat pinngitsooratik malinneqartussaapput, tassa imaappoq isumaqatigiissuteqarnikkut saneqqu-nqarsinnaanngillat. Taamaalilluni oqartussaasoq malunnaarsaarnissamik/qajas-suussinissamik neriorsuuteqarsinnaanngilaq, kinaassutsip isertuunneqarnissaa-nik isumaqatigiissuteqarsinnaanani imaluunniit siunissami allagaatinik paasitin-neqarumanerup itigartinneqarnissaa innersuussutigisinnaanagu. Innuttaasup paasissutissaq allagaatinik paasissutissiinermi malunnaarsaarnissaq/qajassuu-sinissaq pissutigalugu ilaatinneqassanngitsoq taamatuttaaq piumasaqaatigisin-naanngilaa.

FOB 1997.108, Jon Andersenip allallu atuakkiaanni "Forvaltningsret"-imi 2002-meersumi qupperneq 425 aamma Jon Vogterip atuakkiaani "Offentlighedsloven med kommentarer"-mi (1992-imeersumi) qupperneq 181 innersuussutigaakka.

### **3.1.3. Paasitinneqarsinnaatitaaneq pillugu inatsimmi § 13, imm. 1, nr. 6**

Paasitinneqarsinnaatitaaneq pillugu inatsimmi § 13, imm. 1., nr. 6-ikkut makku aalajangersarneqarput:

**“§ 13.** Paasitinneqarsinnaatitaaneq killilerneqarsinnaavoq, tamanna pisariaqarpat makku immikkut eqqarsaatigineqarnissaasa illersorneqarnissaannut:

[...]

6) namminersortut pisortallu soqutigisaat, pineqartup pissusia immikkut ittoq pissutigalugu isertuussinissaq pisariaqarpat.

[...] “

Aalajangersagaq taanna atorneqassappat isiniagassat taaneqartut taakku pisumi naliliiffigineqarnissaat piumasaqaataavoq. Aalajangersagaq taanna atorneqassappat isiginagiassat paasissutissap allagaatinik paasissutissiinermi ilaatinneqanganinnissaanut tunngavilersuutaasinnaasut annertuumik oqimaassuseqarlutik aututissasut aammattaaq piumasaqaataavoq. FOB 2004.114 innersuussutigaara.

Danmarkimi paasitinneqarsinnaatitaaneq pillugu inatsimmi 1970-imeersumi § 2, imm. 2, nr. 4-p oqaasertai Kalaallit Nunaanni paasitinneqarsinnaatitaaneq pillugu inatsimmi atuuttumi § 13, imm. 1, nr. 6-ip oqaasertaasa assigaat. Danmarkimi paasitinneqarsinnaatitaaneq pillugu inatsit 1970-imeersoq pillugu oqaaseqaatinit makku erserput:

“[...] Aalajangersakkap taamaallaat pisuni oqartussaasup inuilluunniit ataasiakkaat soqutigisaat eqqarsaatigalugit isertuussinissap **erseqqissumik pisariaqartinneqarfisiaanni** atorneqartarnissaa naatsorsuutigineqarpoq.

[...]" (Uanga erseqqissaanera)"

Makku inatsisilerineq pillugu atuakkiaasimasunit erserput:

“[...] Paasitinneqarsinnaatitaaneq pillugu inatsisisstatut sinnersuummi 1970-imeersumi assersuusiorsimaneq qularutissaanngitsumik tamakkiisuunngilaq. Taaneqartut saniati-gut illersuinissamut soqutigisat allat ilangunneqarsinnaapput. **Taamaalilluni soqu-tigisat qanoq ittut taamaattoqarnerani ataatsimut aalajangersakkap atorne-qarnera aqqutigalugu isumagineqarsinnaanerannik siumut erseqqvissumik killilersuisoqarsinnaagunangilaq.** Paasissutissiisinnaanerup soqutigisat inatsimi taaneqartut avataanniittut eqqarsaatigalugit killilerneqarnissaannik apeqqut piup-pat illersuinissamik pisariaqartitat sakkortussusiat eqqarsaatigalugu sakkortunerusun-nik piumasaqaateqartoqartariaqassaaq. [...]” (Uanga erseqqissaanera)

John Vogterip atuakkiaani "Offentlighedsloven med kommentarer"-mi pingajus-saanik (1998-imi) naqiterinneqartumi qupperneq 252 innersuussutigaara.

Folketingip Ombudsmandiata makku akissarsianut tapit pillugit FOB 1998.431-mi oqaatigai:

"[...]

Takuneqarsinnaasutut inatsisissatut siunnersuummi immikkut tapit, piukkunnaateqar-nermut tapit sulinermilu akissarsiat paasissutissatut tamanut soqtiginaateqavissutut isigineqarnertik ilisarnaatigaat.

Inunnut ataasiakkaanut tapit paasissutissat inunnut ataasiakkaanut tunngasut, soorlu piukkunnaateqarnermut tapit, sulineq, angusat il.il. pillugit paasissutissat aallaavigalugit aalajangersarneqartarpata tapit aningaasartaasa amerlassusii eqqarsaatigalugit tapit amerlassusiisa paasissutissiissutigineqarnerisa inuit ataasiakkaarlugit assigiin-gisitaartunik akissarsiaqartitsinerup ajornakusoornerulernissaata paasissutissiissuti-gineqarnerata § 13, imm. 1, nr. 5 immaqalu nr. 6 tunngavigalugit tunniukkumane-qannginnissaannut tunngavilersuutaasinnaanera ilimananginnerusorinarpoq.

[...]" (Ombudsmandeqarfimmi nutsigaavoq)

### **3.2. Tunngavilersuut pillugu piumasaqaatit**

Tunngavilersuisarneq pillugu malittarisassat pisortat ingerlatsineranni suliassat suliarineqartarnerat pillugu Inatsisartut inatsisaanni nr. 8-mi, 13. juni 1994-i-meersumi kingusinnerusukkut allannguuteqarsimasumi (matuma kingornatigut suliassat suliarineqartarnerat pillugu inatsimmik taaneqartartussami) ilaatigut §§-tigut 22-kkut aamma 24-kkut imaattunik oqaasertaqartutigut aalajangersar-neqarput:

**"§ 22.** Aalajangiineq allakkatigut nalunaarutigineqaruni aalajangiinermut tunngaviu-sumik ilaqaqtinneqassaaq, suliami peqataasumut tassunga tapersiisuulluinnannngik-kuni.

[...]

**§ 24.** Aalajangiinermut tunngaviusumik nalunaarummi innersuussutigineqassapput i-natsisini maleruaqqusat aalajangiinermi tunngavigineqartut. Maleruaqqusat tamakku malillugit aalajangiineq oqartussaasuni sulisut isumaannik tunngaveqarpat tunngaviusumik nalunaarummi taaneqassapputtaaq pissutaasut pingaernerusut isummat tammakua atornerannut aalajangiisuunerusut.

*Imm. 2.* Tunngaviusumik nalunaarummi pisariaqarpat naatsumik erseqqissarneqassapputtaaq paasissutissat suliami pissusiviusunut tunngasut aalajangiinermi annertuumik pingaartinneqartut.

*Imm. 3. [...]”*

Makku suliassat suliarineqartarnerat pillugu inatsit pillugu oqaaseqaatinit ilaatigut erserput:

“Tunngavilersuut nassuiaataassaaq aalajangiinerup sooq taama imaqarneranut.

Tunngavilersuutip, aalajangigaq pillugu nalunaarutigineqartussap, oqartussaasumit qanoq erseqqissarneqarluartigisariaqarnera eqqoqqissaartumik allaaserineq ajornarpoq. Akissutissap qanoq ittuunissaanut ilaatigut aalajangiisuusariaqarpoq suliami illua’tungiusup akineqartussap suliap suliarineqarnerani suliallu pissusianut qanoq suleqataalluartigisimanera. Taamaattumik aalajangersakkani killilerneqarput (aalajangiinermut) tunngavilersuut pillugu nalunaarutigineqartussat.

[...]

*Imm. 2* malillugu tunngavilersummik nalunaarummi pisariaqarpat naatsumik erseqqissarneqassapputtaaq paasissutissat suliami pissusiviusunut tunngasut, aalajangiinermi annertuumik pingaartinneqartut. Oqartussaasut suliami pisimasuit pillugit isu-maat qanoq annertutigisumik erseqqissartaqarnersoq isummerfigissagaanni ilaatigut paaseqqaartariaqarpoq tamanna isumaqatigiinngissutaasimannnginnersoq, kiisalu aamma suliami illua’tungiusoq tamatuminnga ilisimasaqareersimannginnersoq, soorlu suliamut tunngasumik paasitinneqarnissamik qinnuteqaatimi siusinnerusukkut akuerineqarneranut atasumik.”

Tunngavilersuut eqqortuussaaq, imatut paasillugu oqartussaasup isumaliuter-suutigisimasarpiaanik takutitsisuussasoq. Isigniagassat oqartussaasup pingaartillugit isigniarsimasai tamarmik tungavilersummi oqaatigineqassapput, oqar-

tussaasullu pisut pingaartillugit isiginiarneqarsimannngitsut tunngavilersuummi erseqqissassanngilai.

Missingiussilluni naliliinikkut aalajangiinerit eqqarsaatigalugit pingaarnertut isiginiaqassat missingiusilluni naliliinermi aalajangiisuuusimasut tunngavilersuummi aamma oqaatigineqassapput.

Tunngavilersuut tamanna pisariaqarpat taakkua saniatigut suliami pissusiviusut pillugit paasissutissat aalajangiinermi annertuumik pingaaruteqartillugit isiginiarneqarsimasut pillugit nassuaammik naatsumik imaqassaaq.

Kiisalu tunngavilersuut inatsimmi malittarisassanut aalajangiinermi tunngavigineqartunut innersuusummik erseqqissumik imaqassaaq. Tassa imaappoq aalajangiineq paragraffimut, immikkoortumut, normoqarsimappalluunniit normumut imaluunniit litraqarsimappat litramut innersuussutitaqassasoq.

Erseqqissumik tunngavilersuisoqartarnissaanik piumasaqaatip isummerfiginisaaanut siusinnerusukkut periarfissaqartarsimavunga. Suliat 2021-4, 2020-5, 2019-1 aamma 2018-2 nittartakkanni [www.ombudsmandi.gl](http://www.ombudsmandi.gl)-imi atuarneqarsinnaasut tamatumunnga atatillugu innersuussutigaakka.

Niels Fengerip allallu atuakkiaanni "Forvaltningsret"-imi (2018-imeersumi) quperneq 638 innersuussutigaara.

#### **4. Kommunip isumaa**

Aningaasat B-mut taassuma soraarneranut atatillugu tunniunneqartut pillugit allagaatinik paasitinneqarnissani A-p 28. juli 2021-mi qinnutigaa.

Allagaatinik paasitinneqarumalluni qinnutigisaq kommunip 3. august 2021-mi itigartippaa. Kommuni itigartitsinermini ilaatigut imatut allappoq:

"Ilumoorpoq akissarsianut tunngasut, soorlu tunngaviusumik aningaasartat, tapit, bonusit il.il. suliani sulisunut tunngasuni allagaatinik paasissutissiinermi ilaatinneqarne-

rat, qinnutigisalli pissutsinut taakkununnga tunnganngilaq. Allagaatinik paasitinneqarumalluni qinnutigisaq aamma itigartinneqartariaqarpoq, tassami pineqartoq tassaamat pissutsinut inuup namminerisaminik [inuuneranut], matumani aningaasaqarnermut tunngasut ilanngullugit eqqarsaatigalugit, tunngasoq tak. paasitinneqarsinnaati-taaneq pillugu inatsimmi § 12." (Ombudsmandeqarfimmi nutsigaavoq)

Kommunip uannut oqaaseqaammini 3. november 2021-meersumi paasitinneqarsinnaatitaaneq pillugu inatsimmi § 2-p atorneqarnera pillugu ilaatigut makku oqaatigai:

"[...]

Kommuneqarfik Sermersuup naliliinera unaavoq aningaasat (qassiusinnaasut) [B]-mut taassuma soraerneranut atatillugu tunniunneqarsimasut pillugit allagaatinik paasitinneqarumaneq itigartissallugu kommuni pisussaaffeqartoq.

Kommunip paasinninnera unaavoq paasissutissat § 2, imm. 2 apeqqutaatinnagu § 2, imm. 3 inatsisikkut tunngavigalugu paasissutissiissutigineqartut nalinginnaanerusutut pissuseqartut.

[B]-lli soraernerar pillugu paasissutissat "nalinginnaanerusutut" pissuseqangillat.

Pineqartoq tassaavoq isumaqtigiissut uuttuutit arlallit isiginiarlugit isumaqtigiissutigineqarsimasoq. Tamanna ukioqqortussuseq il.il. tunngavigalugit soraernermut atatillugu nalinginnaanerusumik ajunngitsorsisitsinerup paarlattuatut isigineqassaaq.

[...]" (Ombudsmandeqarfimmi nutsigaavoq)

Kommunip uannut oqaaseqaammini 2022-mi januarimeeersumi paasitinneqarsinnaatitaaneq pillugu inatsimmi § 2-mik atuineq pillugu ilaatigut makku oqaatigai:

"[...]

Kommunip naliliinera unaavoq [B]-p pisumi pineqartumi soraernermut atatillugu ajunngitsoriaasa aningaasartaasa qassiunerannik paasissutissaq paasitinneqarsinnaati-

taaneq pillugu inatsimmi § 2, imm. 3-mi pineqartunut ilaangitsoq, tassuunalu aalajangersarneqarpoq *ateq, ilinniarsimasaq, akissarsianut tunngasut aamma sulinermut atatillugu angalasarsimanerit* pillugit paasissutissat paasissutissiissutigineqarsinnaati-taasut.

Kommunip naliliinera unaavoq paasissutissat pineqartut nalinginnaanerusumik pissuseqartut, taamaattumillu inuit ataasiakkaat aningaasaqarnerannut tunngasut (misikkarissut/isertuussassat) pillugit paasissutissanut attuumassuteqaratik. Pisortani atorfeqartitaasup isumaqatigiissut atuuttoq il.il. tunngavigalugit qanoq akissarsiaqarnera pillugu paasissutissaq paasissutissaagunanngilaq misikkarissoq/isertuussassaq.

Kommunilli soraarneq pillugu pisumi isumaqatigiisummi soraarsitsiniarluni suliap ingerlalereerfigisimasaanut ilaasumi ajunngitsorsiat aningaasartaasa qassiunerat pillugu paasissutissaq nalinginnaasutut pissuseqanngimmat § 2, imm. 3-mi pineqartunut ilaangitsutut isigaa.

[...]

Qulaani oqaatigineqartunit ertsertutut Kommuneqarfik Sermersuup naliliinera unaavoq pisumi soraarnermi ajunngitsorsiat soraarsitsiniarnerup ingerlalereerfiani isumaqatigiinniutigineqarsimasut pillugit paasissutissaq paasitinneqarsinnaatitaaneq pillugu inatsimmi pineqartunut ilaasutut isigineqarsinnaanngitsoq, paasissutissarmi taanna § 2, imm. 3-mi pineqartunut ilaatinneqanngimmat.

Kommunilli tamatumunnga peqatigitillugu naliliinera unaavoq paasissutissat paasitinneqarsinnaatitaaneq pillugu inatsimmi pineqartunut ilaasutut isigineqarunik paasitinneqarsinnaatitaaneq pillugu inatsimmi § 12 paasissutissiinermi paasissutissanik/allagaatinik aalajangersimasunik ilaatisinnginnissamut tunngaviusoq aamma § 13 paasissutissanik, pisumi pineqartumi tamanna ilaatigut namminersortut soqtigisaat pingaaruteqartut mianerineqarnissaat eqqarsaatigalugit pisariaqarpat, allagaatinik paasissutissiinermi ilaatisinnginnissamut tunngaviusoq tunngavigalugit ilaatinneqanngis-sinnaallutillu ilaatinneqanngitsussaasut.

[...] (Ombudsmandeqarfimmi nutsigaavoq)

Kommunip oqaaseqaataa imatut paasivara aningaasat B-mut taassuma soraarneranut atatillugu tunniunneqarsimasut pillugit paasissutissaq allagaatinik paa-

sissutissiinermi ilaatinngikkaa, aningaasat pillugit paasissutissap paasitinneqarsinnaatitaaneq pillugu inatsisip atuuffiata avataaniinera tunngavilersuutigalugu.

Kommunip oqaaseqaataa aamma imatut paasivara kommunip paasissutissaq taanna ilaatinngikkaa, paasitinneqarsinnaatitaaneq pillugu inatsimmi § 12, imm. 1, nr. 1 aamma § 13, imm. 1, nr. 6 innersuussutigalugit - aningaasat pillugit paasissutissaq paasitinneqarsinnaatitaaneq pillugu inatsisip atuuffiani pineqartunut ilaatinneqaraluarpalluunniit.

Kommunip uannut oqaaseqaammini 3. november 2021-meersumi makku paasitinneqarsinnaatitaaneq pillugu inatsimmi § 12, imm. 1, nr. 1-ip aamma § 13, imm. 1, nr. 6-ip atorneqarnerat pillugu oqaatigai:

“[...]

Kommunip paasinninera unaavoq paasissutissat taakku misikkariissuusut/isertuussassaasut. Tamatumani oqaatigineqarpoq aningaasat qassiunerat pillugu paasissutissaq allagaatinik paasissutissiinermi paasissutissiissutigineqarpat tamatuma aningaasat tunniunneqarnerannut tunuliaqutaasoq aningaasartuutilluunniit assigiinngitsut qanoq katitigaanerat sukumiinerusumik ilisimasaqarfinginagu tusagassiuutini allaaserineqattaarnissaa tamanillu alapernaaserneqarnissaa qularutissaassanngitsoq.

[B]-p paasissutissat tamanut annertunerusumik soqtiginaateqannngitsutut ittut kisiisa pissutigalugit taamatut tamanit alapernaaserneqarnissaa - immikkoortillugu isigigaanni - pissusissamisoorsorinanngilaq. Aamma tamakku pissutigalugit isumaqatigiissumi aalajangersarneqarpoq taanna isertuunneqassasoq.

” (Ombudsmandeqarfimmi nutsigaavoq)

Kommunip uannut oqaaseqaammini 2022-mi januarimeersumi ilaatigut makku paasitinneqarsinnaatitaaneq pillugu inatsimmi § 12, imm. 1, nr. 1-ip atorneqarnera pillugu oqaatigai:

“[...]

Kommunip naliliinera unaavoq pisumi pineqartumi soraarnermi ajunngitsorsiat aningasartaasa qassiunerat pillugu paasissutissaasoq [B]-p nammineq aningaasaqarneranut tunngasuusoq.

Soraarnermi ajunngitsorsiat pisumi soraarsitsinermik inernilerneqarsinnaasumi isumaqtigiinniutigineqartut qassiunerat pillugu paasissutissaq paasissutissaavoq nalinginnaasuunngitsoq, pissutsinut inuup pineqartup atugaanut aningaasaqarneranullu erseqqisumik atanilerneqarsinnaanngitsoq.

Isumaliutersuutit taakku aningaasat qassiunerannik paasissutissaq isertuunneqassasoq kommunip [B]-llu soraarneq pillugu isumaqtigiissummi aalajangersakkamik ilangussisimanerannut tunngaviupput. Oqartussaasup isertuussisoqarnissaanik kinaassutsilluunniit isertuunneqarnissaanik nalinginnaasutigut neriorsuisinnaannginnera, neriorsuisimanerlu innersuussutigalugu neriorsuinerup qanoq annertutiginera pillugu paasitinneqarumanermik itigartitsissutiginnissinnaannginnera kommunip eqqumaffigaa. Pisumili pineqartumi isertuussinissamik neriorsuisimaneq (annertungaatsiartumik) pingaaruteqartillugu isiginiarneqartariaqarpoq.

[...]" (Ombudsmandeqarfimmi nutsigaavoq)

Kommunip paasitinneqarsinnaatitaaneq pillugu inatsimmi § 13, imm. 1, nr. 6-ip atorneqarnera pillugu makku aamma oqaatigai:

"[...]

Kommunip naliliinera unaavoq suliami pineqartumi soraarnermi ajunngitsorsiat aningasartaasa qassiunerannik paasissutissap tamanut saqqummiunneqarnera naleqqu-tunngitsoq pitsaasununilu. Kommuni pisumi pineqartumi [B]-p aviisitigut eqqartorneqareersimanera isiginiarlugu naliliivoq paasissutissat innuttaasuni aalassassimaarnermik [B] eqqarsaatigalugu pitsaanngitsumik pilersitsisinnaasut.

Ataqatigiinneqarnermi tassani Kalaallit Nunaanni innuttaasut ikittunnguunerat Kalaallillu Nunaanni pingartumillu Nuummi innuttaasut amerlanersaasa [B]-p kinaaneranik ilisimasaqarnerisa ilisimasaqarnissaasaluunniit ilimagisariaqarnerat isiginiarneqartariaqarpoq.

[...]" (Ombudsmandeqarfimmi nutsigaavoq)

## **5. Uanga naliliinera**

### **5.1. Paasitinneqarsinnaatitaaneq pillugu inatsimmi § 2**

**5.1.1.** Immikkoortumi 3.1.1-imi oqaatigisakka tunngavigalugit naliliinera unaavog soraarnermi ajunngitsorsiat paasitinneqarsinnaatitaaneq pillugu inatsimmi pineqartunut ilaatinneqartut, tak. paasitinneqarsinnaatitaaneq pillugu inatsimmi § 2, imm. 3 taannalu pillugu oqaaseqaatit.

**5.1.2.** Kommunip uannut oqaaseqaataanit 2022-mi januarimeersumit erserpoq kommunip paasinninnersa unaasoq paasitinneqarsinnaatitaaneq pillugu inatsimmi § 2, imm. 3 taamaallaat allagaatinik “nalinginnaanerusunik” paasissutissiissutigginninnermut inatsisikkut tunngavissaliisoq.

Uanga paasinninnersa unaavoq kommunip “nalinginnaanerusut”-mik oqaasertaliinermut innersuussinera matuminnga tunngavilersorneqartoq, tassalu paasitinneqarsinnaatitaaneq pillugu inatsimmi § 2, imm 3 pillugu oqaaseqaatinit ersertoq pissutsit inatsimmi pineqartunut ilaatinneqartut tassaasut “siullermik paasisutissat “nalinginnaanerusut” arlallit.””

Uanga naliliinera unaavoq aalajangersakkap oqaasertaani imaluunniit aalajangersaq taanna pillugu oqaaseqaatini manna takuneqarsinnaanngitsoq, tassalu paasissutissaq paasiumaneqartoq nalinginnaanerusutut pissuseqarnersoq oqartussaasoq pisumi naliliissasoq. Inatsit pillugu oqaaseqaatini paasissutissanut “nalinginnaanerusunut” innersuussineq pissutsinut aalajangersakkami pineqartunut ilaatinneqartunut, soorlu atorfekartup aqqa, atorfia, ilinniagaqarnera il.il. pilugit paasissutissanut pingarnertut taaguutitut taamaallaat isigaara.

Tamanna tunngavigalugu uanga paasinninnersa taamaalilluni unaavoq kommuuni allagaatinik paasitinneqarumanermi atorfekartup aqqa, atorfia, ilinniarsimanera, suliassai, akissarsiaanut tunngasut sulinermullu atatillugu angalarneri pillugit paasissutissat pineqartunut ilaatinneqarnersut taamalu paasitinneqarsinnaatita-

neq pillugu inatsimmi § 2, imm. 3-mi pineqartunut ilaatinneqarnersut naliliinsamminut taamaallaat pisussaaffeqartoq.

Soraarnermi ajunngitsorsiat akissarsianut tunngasunut innersuussinermi pineqartunut ilaatinneqartut paasitinneqarsinnaatitaaneq pillugu inatsit pillugu oqaaseqaatini oqaatigineqarmat uanga paasinninnera unaavoq kommunip aningaasat B-mut taassuma soraarneranut atatillugu tunniunneqartut qassiunerat pillugu paasissutissaq paasitinneqarsinnaatitaaneq pillugu inatsimmi § 2, imm. 3, tak. § 2, imm. 2, tunngavigalugu ilaatinngitsoorsinnaanngikkaa.

**5.1.3.** Kommunip uannut oqaaseqaammini 3. november 2021-meersumi soraarnermut isumaqatigiissut "isumaqatigiissut uuttuutit arlallit isiginiarlugit isumaqatigiissutigineqarsimasoq"-mik, imaanngitsoq ukioqqortussuseq tunngavigalugu, oqarnerata uanga paasinninnera allangortinngilaa. Kommunip uannut oqaaseqaammini 2022-mi januarimeersumi soraarnermi isumaqatigiissummi isumaqati-giinniutigineqartumi soraarnermi ajunngitsorsiat pisumi "soraarsitsiniarnermik suliap ingerlalereerfiani" ilaanerannik oqarnerata uanga paasinninnera taamatuttaaq allangortinngilaa.

**5.1.4.** Soraarnermi ajunngitsorsiat paasitinneqarsinnaatitaaneq pillugu inatsisip atuuffiani pineqartunut ilaatinneqartut uanga paasinninnerigakku paasissutissap allagaatinik paasissutissiineremi ilaatinneqanngitsoorsinnaanera pillugu apeqquq paasitinneqarsinnaatitaaneq pillugu inatsimmi malittarisassat allat tunngavigalugit aalajangerneqartariaqarpoq.

## **5.2. Paasitinneqarsinnaatitaaneq pillugu inatsimmi § 12, imm. 1, nr. 1**

**5.2.1.** Immikkoortumi 3.1.2-mi allaaserineqartutut paasissutissaq allagaatinik paasissutissiineremi ilaatinneqanngitsoorsinnaavoq, pissutsinut inuup pineqartup atugaanut, matumani aningaasaqarnermut tunngasut ilanngullugit eqqarsaatigalugit, tunngasuuguni, tak. paasitinneqarsinnaatitaaneq pillugu § 12, imm. 1. nr.1. Aalajangersagaq taanna pillugu oqaaseqaatinit erserpoq allagaatinik paasitinneqarumalluni qinnutigisaq itigartinneqassappat tassani paasissutissaq pineqartoq pissutsini pissutigalugu misikkarissutut/isertuussassatut taaneqarsinnaanersoq

taamaattumillu inuiaqatigiinni nalinginnaasumik paasinninneq tunngavigalugu ilaatinneqanngissinnaasariaqarnersoq apeqqutaasoq.

Kommunip uannut oqaaseqaammini tamani oqaatigaa kommunip naliliinera unaasoq soraarnermi ajunngitsorsiat pillugit paassisutissaq paassisutissaasoq misikkarissoq/isertuussassaq. Kommunip oqaaseqaammi 2022-mi januarimeersumi aamma oqaatigaa soraarnermi ajunngitsorsiat pillugit paassisutissaq B-p nammineq aningaasaqarneranut tunngasuusoq.

**5.2.2.** Uanga paasinninnersa unaavoq soraarnermi ajunngitsorsiat ilisimaneqarnerat pissutsit B-mut tunngasut, matumani aningaasaqarnermut tunngasut ilangullugit eqqarsaatigalugit, pillugit ilisimasaqarnerunngitsoq, taamaattumillu taakku pillugit paassisutissiineq B-p nammineq aningaasaqarnera pillugu qulaa-jaasuunavianngitsoq.

Kommunip oqaaseqaammi 2022-mi januarimeersumi oqaatigaa pisortani atorfekartitaasup isumaqatigiissut atuuttoq tunngavigalugu akissarsiai pillugit paassisutissaq paassisutissaanngitsoq misikkarissoq/isertuussassaq. Taamatut oqarneq isumaqatigaara.

Uanga naliliinera unaavoq soraarnermi ajunngitsorsiat aningaasartaat pillugit paassisutissaq, akissarsiat pillugit paassisutissap isigineqarnerata pissuseqataanik, paassisutissatut misikkarissutut/isertuussassatut isigineqarsinnaanngitsoq.

Taamaalluni uanga naliliinera unaavoq soraarnermi ajunngitsorsiat pillugit paassisutissaq paassisutissinermi paasitinneqarsinnaatitaaneq pillugu inatsimmi § 12, imm. 1, nr. 1 innersuussutigalugu ilaatinneqanngitsoorsinnaanngitsoq.

**5.2.3.** Kommunip oqaaseqaammi 3. november 2021-meersuni oqaatigaa B-p soraarnermi ajunngitsorsiai pillugit paassisutissamik A paassisutissinneqarpat tamanna aningaasanut tunuliaquataasoq aningaasartuutilluunniit assigiinngitsut kattigaanerat ilisimaneqanngitsoq tusagassiuutini allaaserisaqaqattaarnermut innuttaasullu alapernaasernerannut pissutissaqalersitsissasoq. Tamanna imatut

paasivara kommunip paasinninera unaasoq B-p tamanit pitsaanngitsumik oqa-luuserineqalernera tassunga pitsasuunngitsoq.

Immikkoortumi 3.1.2-mi oqaatigineqartutut paasissutissanik paasitinneqarsin-naatitaaneq pillugu inatsimmi § 12, imm. 1, nr. 1 innersuussutigalugu isertuussi-soqassappat soqtigisanik pisumi oqimalutaasoqarnissaa piumasaqaataanngit-soq, allagaatinillu paasissutissiineq inuup paasissutissani pineqartup ajoquserne-qarsinnaanera ulorianateqarnersoq apeqqutaatinnagu atuuttoq.

Uanga paasinninera unaavoq isiginagiagassanik kommunip paasitinneqarsinnaa-titaaneq pillugu inatsimmi § 12, imm. 1, nr. 1-imik naliliineranut atatillugu oqi-maalutaanera pingaaruteqartutut isiginiarneqarsinnaanngitsoq.

**5.2.4.** Kommunip oqaaseqaammi 2022-mi januarimeersumi oqaatigaa kommu-nip naliliinera unaasoq isertuussinissamik aalajangersagaq soraarneq pillugu isu-maqatigiissummi ilanngunneqarsimasoq annertungaatsiartumik pingaaruteqartil-lugu isiginiarneqartariaqartoq.

Immikkoortumi 3.1.2-mi allaaserineqartutut paasitinneqarsinnaatitaaneq pillugu inatsimmi malittarisassat pinngitsooratik malinneqartussaapput, tassa imaappoq isumaqtigiissuteqarnikkut saneqqunneqarsinnaanngillat.

Taamaattumik pisumi pineqartumi isertuussinissamik neriorsuutip pingaarute-qartutut isigisariaqarneranik kommunip paasinninera isumaqtiginngilara. Taa-maalluni uanga paasinninera unaavoq soraarneq pillugu isumaqtigiissummi isertuussinissamik aalajangersakkap soraerner mi ajunngitsorsiat pilligit paasis-sutissap allagaatinik paasissutissiinermi ilaatinneqanngissinnaanera nassatarin-ngikkaa.

### **5.3. Paasitinneqarsinnaatitaaneq pillugu inatsimmi § 13, imm. 1, nr. 6**

**5.3.1.** Allagaatinik paasitinneqarumanermik qinnutigisaq pisumi naliliineq tun-ngavigalugu paasitinneqarsinnaatitaaneq pillugu inatsimmi § 13, imm. 1, nr. 6 tunngavigalugu killilerneqarsinnaavoq, tamanna namminersortut pisortallu an-

nertuumik soqtigisaasa illorsorneqarnissaat pisariaqarpat, tassanilu pissutsip immikkut ittuunera pissutigalugu isertuussineq pisariaqarpat. Aalajangersakkap oqaasertaani erseqqissumik oqaatigineqarpoq isertuussineq pissutsip *immikkut* ittuunera pissutigalugu pisariaqartuussasoq.

Uanga paasinninera unaavoq namminersortup soqtigisaa annertooq kommunip allagaatinik paasitinneqarumalluni qinnutigisamik itigartitsinermini tunngavilersuutaa tassaasoq B-p nammineq inuuneqarnera.

**5.3.2.** Soraarnermi ajunngitsorsiat pillugit paasissutissap misikkariissuunera/i-sertuussassaanera kommunip oqaaseqaammini 3. november 2021-meersumi innersuussutigaa. Kommunip isigniagassat paasitinneqarsinnaatitaaneq pillugu inatsimmi § 12, imm. 1, nr. 1-ikkut illersugaareersut taamaalilluni tunngaviutiniarpai.

Pissutsit inuit ataasiakkaat atugaannut, matumani aningaasaqarnerannut tunngasut ilanngullugit eqqarsaatigalugit, tunngasut illersugaasut § 12, imm. 1, nr. 1-imi taagorneqareersimammata uanga naliliinera unaavoq pissuseq taanna ima *immikkut* itsiginngitsoq, paasissutissap paasitinneqarsinnaatitaaneq pillugu inatsimmi § 13, imm. 1, nr. 6 innersuussutigalugu ilaatinneqannginnissaanut periarfissaqarnani.

**5.3.3.** Kommunip oqaaseqaammi 2022-mi januarimeersumi aamma oqaatigaa A-p soraarnermi ajunngitsorsiat pillugit paasissutissinneqarnera “naleqquttuungitsoq pitsasuunani” , “paasissutissa[mmi] innuttaasuni aalassassimaarnermik [B] eqqarsaatigalugu pitsaanngitsumik pilersitsisinnaa[mmata].”

Kommunip ataqtigiinneqarnermi tassani oqaatigaa B aviisitigut eqqartorneqareersimasoq, Kalaallillu Nunaanni pissutsit immikkut ittut isigniarneqassasut, kommunimmi ilimagimmagu amerlanerpaat B kinaasoq nalunngikkaat ilisimasaqarfigaluguluunnit.

B-p Kalaallit Nunaanni innuttaasorpassuarnit naluneqannginnera allagaatinik paasitinneqarumanermik itigartitsinermut tunngavilersuutitut suliamut attuu-

massuteqanngitsutut isigaara. Kialuunniit kommunimi pisortaanerusutut atorfekartitaasup atorfekartitaasimasulluunniit tusagassiuutitigut – pitsaasumik pitsaanngitsumillu – eqqartorneqarnissani naatsorsuutigisariaqarpaa – pingaartumik soraarnerminut atatillugu.

Tamatumunnga uiggiullugu paasitinneqarsinnaatitaaneq pillugu inatsimmi § 13, imm. 1, nr. 1 atorneqassappat suli piumasaqaataavoq isertuussisoqarnissaa pi-neqartup pissusiata *immikkut* ittuunera pissutigalugu pisariaqartuussasoq.

Uanga naliliinera unaavoq § 2, imm. 3 pillugu oqaaseqaatini soraarnermi ajungitsorsianut innersuussineq ima isumaqartoq akissarsiat tapillu allat pilligit paasissutissat paasissutissatut tamanut soqutiginaateqavissuunertik ilisarnaatigagaat.

Uanga tamanna tunngavigalugu naliliinera unaavoq soraarnermi ajungitsorsiat pilligit paasissutissamik isertuussinissaq pisup immikkut ittuunera tunngavigalugu pisariaqartuunngitsoq. Taamaalilluni aningaasat B-mut taassuma soraarnernut atatillugu tunniunneqartut amerlassusiat pillugu paasissutissaq kommunip allagaatinik paasissutissiinermi paasitinneqarsinnaatitaaneq pillugu inatsimmi § 13, imm., nr. 6 innersuussutigalugu ilaatinngitsoorsinnaanngilaa.

## **5.4. Tunngavilersuut pillugu piumasaqaatit**

**5.4.1.** Imm. 3.2-mi oqaatigineqartutut aalajangersagaq eqqortumik sukumiisumillu tunngavilersugaassaaq. Aalajangiinermi paragraffimut, immikkoortumut, litraqarsimappat litramut normoqarpallu normunut innersuussisoqassaaq.

Kommuni aalajangiinermi 3. august 2021-meersumi taamaallaat paasitinneqarsinnaatitaaneq pillugu inatsimmi § 12-imut innersuussivoq. Uanga naliliinera unaavoq inatsisikkut tunngavigisamut innersuussut taanna naammanngitsoq/amigartoq.

**5.4.2.** Immikkoortumi 3.1.2-mi oqaatigineqartutut paasitinneqarsinnaatitaaneq pillugu inatsimmi § 12, imm. 1, nr. 1 atorneqassappat pisumi soqutigisanik oqi-

maalutaasoqarnissaa piumasaqaataanngilaq, taamaallaalli allagaatinik paasitinneqarumanermi allagaatit pissutsinut inuit ataasiakkaat, matumani aningaasarnerannut tunngasut ilanngullugit eqqarsaatigalugit, atugaannut tunngasunik ilaatinneqarnersut apeqquaalluni. Kommuni tamatumunnga atatillugu naliliisaq paasissutissaq misikkarissutut/isertuussassatut taaneqarsinnaanersoq imattullu pissuseqarnersoq inuiaqatigiinni nalinginnaasumik paasinnittaaseq malillugu tamanit ilisimalerneqarnissaanut isertuunneqassasoq piumasaqaatigisariaqarlu-ni.

Aalajangiineq 3. august 2021-meersoq soraarnermi ajunngitsorsiat pillugit paasissutissaq B-p nammineq inuuneqarnera, matumani aningaasaqarneranut tunngasut ilanngullugit eqqarsaatigalugit, pillugu paasissutissaq paasissutissatut misikkarissutut/isertuussassatut sooq isigineqassasoq nassuaammik ilaqtarinneqanngilaq. Isumaliutersuutit allat naliliinermi ilanngunneqarsimanersut kommunip taamatuttaaq allaaserisimangilaa.

Kommunip aalajangiinera amigaatilittut tunngavilersuullu suliassat suliarineqartnerat pillugu inatsimmi aalajangiineq pillugu piumasaqaatinik immikkoortumi 3.2-mi allaaserineqartunik eqqortitsisuunngitsutut isigaara.

**5.4.3.** Kommunip itigartitsinera 3. august 2021-meersoq aallaavigalugu uanga paasinninera unaavoq A-p allagaatinik paasitinneqarumalluni qinnutigisaa kommunip akissarsianut, soorlu tunngaviusumik akissarsianut, tapisianut bonusinut il.il., tunngasunut pineqartunut ilaannngitsutut isigigaa.

Uanga tamanna tunngavigalugu paasinninera unaavoq kommunip naliliinera unaasoq soraarnermi ajunngitsorsiat pillugit paasissutissaq paasitinneqarsinnaati-taaneq pillugu inatsimmi § 2, imm. 3-mi pineqartunut ilaatinneqanngitsoq.

Kommunilli allagaatinik paasitinneqarumanermik itigartitsinerani 3. august 2021-meersumi § 2, imm. 3-mut imaluunniit aalajangersagaq taanna tunngavigalugu pisumi naliliinermut innersuussummik takusassaqaanngilaq.

Tamanna tunngavigalugu tunngavilersuut aalajangiinermi oqaatigineqartoq kommunip isumaliutersuutigisimasarpiaanik takutitsisuunngitsutut isigaara.

Taamaattumik uanga naliliinera unaavoq kommunip tunngavilersuutaa amigaate-qartoq, tassami isumaliutersuutit aalajangersakkalluunniit sorlerpiat kommunip ilanngussimanerai tunngavilersuummi takuneqarsinnaanngimmat.

**5.4.4.** Qulaani oqaatigineqartutut uanga paasinninera unaavoq kommunip naliliinera unaasoq soraarnermi ajunngitsorsiat pillugit paasissutissaq paasitinneqarsinnaatitaaneq pillugu inatsisip atuuffiani ilaatinneqanngitsoq, tak. paasitinneqarsinnaatitaaneq pillugu inatsimmi § 2, imm. 2 aamma 3.

Kommunilli uannut oqaaseqaammini oqaatigaa soraarnermi ajunngitsorsiat pillugit paasissutissaq paasitinneqarsinnaatitaaneq pillugu inatsimmi § 2, imm. 3 innersuussutigalugu pineqartunut ilaatinneqarsinnaanngikkuni tassunga taarsiul-lugu paasitinneqarsinnaatitaaneq pillugu inatsimmi § 12, imm. 1 nr. 1 aamma § 13, imm. 1, nr. 6 tunngavigalugit ilaatinneqanngissinnaasoq.

Oqaatigaara eqqortumik aalajangiisoqartarnissaanik piumasaqaat imatut isuma-qartoq kommunip aalajangiinermi taarsiullugit tunngavilersuutitut periarfissat al-lat oqaatigisinnaanngikkai, soraarnermimi ajunngitsorsiat pillugit paasissutissaq paasitinneqarsinnaatitaaneq pillugu inatsimmi pineqartunut ilaatinneqarmat ilaa-tinneqaraniluunniit.

## **6. Eqikkaalluni inerniliineq**

Isumaqpungunga aningaasat B-mut taassuma soraarneranut atatillugu ajunngitsorsiatut tunniunneqartut pillugit paasissutissaq paasitinneqarsinnaatitaaneq pil-lugu inatsimmi § 2, imm. 3-mi pineqartunut ilaatinneqartoq.

Isumaqpungattaaq soraarnermi ajunngitsorsiat pillugit paasissutissaq inuup nammineq inuuneqarneranut, matumani aningaasaqarneranut tunngasut ilan-gullugit eqqarsaatigalugit, tunngasut pillugit paasissutissatut misikkarissutut/i-sertuussassatut pissuseqanngitsoq, soraarnermilu ajunngitsorsiat pillugit paasis-

sutissap isertuunneqarnissaa pissutsip immikkut ittuunera pissutigalugu pisaria-qanngitsoq. Taamaalilluni uanga naliliinera unaavoq kommunip soraarnermi a-junngitsorsiat pillugit paasissutissaq paasitinneqarsinnaatitaaneq pillugu inatsimi § 12, imm. 1, nr. 1 imaluunniit § 13, imm. 1, nr. 6 innersuussutigalugit ilaatin-ngissinnaanngikkaa.

Uanga paasinninera unaavoq kommunip aalajangiinera 3. august 2021-meersoq amigaateqartoq, kommunimmi aalajangersagaq aalajangiinermini tunngavigisi-masani erseqqissumik innersuussutigingimmagu.

Uanga paasinninera aamma unaavoq kommunip aalajangiinera 3. august 2021-meersoq amigaateqartoq, kommunimmi soraarnermi ajunngitsorsiat pillugit paa-sissutissaq paasissutissatut misikkarissutut/isertuussassatut sooq isignerlugu nassuiarsimanngimmagu.

Kiisalu uanga paasinninera unaavoq kommunip aalajangiinera 3. august 2021-meersoq amigaateqartoq, aalajangiingermi kommunip isumaliutersuutigisima-sarpiaanik takutitsisuunngimmat, tassami kommunip uannut oqaaseqaatiminii pissutsit aalajangiinermi eqqaaneqarsimanngitsut oqaatigisimammagit.

Ataatsimut isiginnillunga isumaqarpunga kommunip aalajangiinermut 3. august 2021-meersumut tunngavilersuutaa isorisariaqartuuusoq.

Kommuni tamanna tunngavigalugu qinnuigaara suliaq oqaaseqaatikka isiginiar-lugit suliareqqeqquullugu.

Kommuni qinnuigaara tamanna kommunip qanoq iliuuseqarnissaanut pissutissa-qalersitsinersoq uannut nalunaarutigeqqullugu.

Oqaaseqaat manna oqaaseqaammi pineqartut kikkuussusii ilisarnarunnaarsillugit nittartakkut tamanut saqqummiunneqassaaq 2022-milu ukiumoortumik nalunaarutinni eqqaaneqassalluni.

## **Suliap ingerlasimanerata allaaserineqarnera**

A-p allagaatinik paasitinneqarnissami kommunimut 28. juli 2021-mi qinnutigaa. Allagaatinik paasitinneqarumalluni qinnutigisami tassani makku oqaatigineqarput:

"Aningaasat [B]-mut taassuma Kommuneqarfik Sermersumi atorfimminit soraarneranut atatillugu tunniunneqartut pillugit allagaatinik paasitinneqarumallunga qinnuteqarpunga. [Lektor]-ip immikkut ilisimasallip Danmarks Medie- og Journalisthøjskole-milu ingerlatsinermi pisortaasoq oqarpoq allagaatinik taamatut paasitinneqasinnaatitaasunga. [Lektor]-ip oqaatigaa taamaalillutik suliani soraarnernut tunngasuni aningaasat pillugit paasissutissat paasissutissiinermi pineqartunut ilaatinneqartut." (Ombudsmandeqarfimmi nutsigaavoq)

A-p allagaatink paasitinneqarumalluni qinnutigisaa kommunip 3. august 2021-mi itigartippaa, makku oqaatigalugit:

"Ilumoopoq akissarsianut tunngasut, soorlu tunngaviusumik aningaasartat, tapit, bonusit il.il. suliani sulisunut tunngasuni allagaatinik paasissutissiinermi ilaatinneqangannginnerat, qinnutigisalli pissutsinut taakkununnga tunnganngilaq. Allagaatinik paasitinneqarumalluni qinnutigisaq aamma itigartinneqartariaqarpoq, tassami pineqartoq tassaammat pissutsinut inuup namminerisaminik [inuuneranut], matumani aningasaqarnermut tunngasut ilanngullugit eqqarsaatigalugit, tunngasoq tak. paasitinneqarsinnaatitaaneq pillugu inatsimmi § 12." (Ombudsmandeqarfimmi nutsigaavoq)

Allagaatinik paasitinneqarumalluni qinnutigisami 28. juli 2021-meersup kommunimit itigartinneqarnera A-p uannut 18. august 2021-mi naammagittaalliuutigaa.

Kommuni 1. september 2021-mi qinnuigaara suliami allagaatit tamasa suliarlu pillugu oqaaseqaat uannut nassiuteqqullugit. Makku ilaatigut oqaatigaakka:

"[...]

**1.** Kommuneqarfik Sermersup (matuma kingornatigut kommunimik taaneqartartussap) allagaatinik paasitinneqarumanerup itigartinneqarnissaanik aalajanginera 3. august 2021-meersoq [A]-p uannut e-mailikkut 18. august 2021-meersukkut ilanngus-sartalikkut naammagittaalliuutigaa.

Kommuni qinnuigaara suliami [A]-p suliami allagaatinik paasitinneqarumaneranut tunngasumi allagaatit tamaasa kiisalu suliaq pillugu oqaaseqaat uannut nassiateqqlugit.

[A]-p kommunimut e-mailianit 28. juli 2021-meersumit erserpoq aningaasat B-mut taassuma kommunimit atorfimminit sorarneranut atatillugu tunniunneqarsimasut pil-lugit allagaatinik paasitinneqarnissani kissaatigigaa.

Kommuniap aalajangiinera 3. august 2021-meersoq imatut paasineqassanersoq paa-siuminaatsippara, tassalu kommuni naliliisimasoq paasissutissat [A]-p paasiumallugit kissaatigisai paasitinneqarsinnaatitaaneq pillugu inatsimmi § 2, imm. 2 tunngavigalu-gu paasitinneqarsinnaatitaaneq pillugu inatsimmi pineqartunut ilaatinneqanngitsut. I-maluunniit kommuni naliliisimasoq paasissutissat [A]-p paasiumallugit kissaatigisai paasitinneqarsinnaatitaaneq pillugu inatsimmi pineqartunut ilaatinneqartut, paasissu-tissiinermili ilaatinneqassanngitsut, tak. paasitinneqarsinnaatitaaneq pillugu inatsimmi § 12, imm. 1.

**2.** Pisortat ingerlatsinerat pillugu paasitinneqarsinnaatitaaneq pillugu Inatsisartut inat-sisaanni (paasitinneqarsinnaatitaaneq pillugu inatsimmi) nr. 9-mi, 13. juni 1994-i-meersumi kingusinnerusukkut allannguuteqartinneqartumi § 2, imm. 2-kkut aamma 3-kkut makku aalajangersarneqarput:

*"Imm. 2. Aammattaaq sulianut pisortani sulisunik atorfinititsinernut imaluunniit pisortani atorfinnut qaffasinnerusunut qaffatsinneqarnerunut tunngasunut inatsit a-tuutinngilaq, § 6-im i aalajangersagaq eqqaassanngikkaanni. Tamanna paasissutis-sanut inuit ataasiakkaat pisortani atorfeqarnerannut tunngassuteqartunut aamma atuuppoq, taamaattorli imm. 3 aamma § 4, imm. 2 takuuk.*

*Imm. 3. Suliani imm. 2-mi oqaaseqatigiit aappaanni taaneqartuni atorfeqartup aq-qa, atorfia, ilinniagaqarnera, suliassai, akissarsiai suliamullu atatillugu angalaneri pillugit paasissutissanut inatsit atuuppoq. Aammattaaq pisortatut atorfinni atorfinititsinneqartut eqqarsaatigalugit inatsit suliamut atatillugu mianersoqqussutit iliuu-serisallu taakkunanna sakkortunerusut pillugit paasissutissanut atuuppoq. Taa-maattorli tamakku pillugit inaarutaasumik aalajangiinermit ukiuni marlunni taa-mallaat tamanna atuuppoq."*

Paasitinneqarsinnaatitaaneq pillugu inatsimmi § 2, imm. 3 pillugu oqaaseqaatinit ilaa-tigut makku erserput:

*"1. Aalajangersakkap taassuma sulisorisat pillugit paasissutissan aalajangersima-suni paasissutissat ilaasa imm. 2-mi oqaaseqatigiit aappaanni taaneqarsimasut*

paasitinneqarsinnaatitaaneq pillugu inatsimmi pineqartunut ilaatinneqarnerat nas-sataraa.

[...]

Aammattaaq paasissutissat akissarsianut tunngasut inatsimmi pineqartunut ilaatin-neqarput. Tamanna tunngaviusumik akissarsiaannarnut il.il. atuutinngilaq, aammali qaangiuttoornersianut, pikkorissarnermut immikkullu suliaqarnermut tapisianut, tapisianut immikkut ittunut, soraarnermut atatillugu ajunngitsorsianut soraarne-russutisianullu il.il. atuulluni. [...] Kisianni assersuutigalugu tapisianik tunineqarneq imaluunniit soraarnermut atatillugu ajunngitsorsiassat pillugit isumaqatiglissteqar-nermi tunngaviusut erseqqinnerusut pineqartunut ilaatinneqanngillat.

[...]"

Paasitinneqarsinnaatitaaneq pillugu inatsimmi § 12-ikkut aalajangersarneqarpoq paa-sissutissat aalajangersimasut allagaatinik paasissutissiinermi ilaatinneqassanngitsut. § 12 imaattunik oqaasertaqarpoq:

"**§ 12.** Paasitinneqarsinnaatitaanermi paasissutissat makku ilaatinneqanngillat:

- 1) inuit ataasiakkaat inuuneri pillugit paasissutissat, matumani aningaasaqarneran-nut tunngasut ilanngullugit,
- 2) teknikkikkut atortulersuutit imaluunniit periutsit imaluunniit ingerlatsinikkut niuernikkulluunniit pissutsit assigisaalluunniit, inummut suliffeqarfimmulluunniit a-ningaasaqarnikkut annertuumik pingaarutillit pissutigalugit saqqummiunneqarnis-saat akuersissutigineqarsinnaanngitsut.

*Imm. 2. Allakkiap ilaanna imm. 1-imi aalajangersakkamut ilaatinneqarpat allakkiap imarisata sinnera pillugu pineqartoq paasitinneqassaaq."*

Paasitinneqarsinnaatitaaneq pillugu inatsimmi § 12, imm. 1, nr. 1 pillugu oqaaseqaa-tinit ilaatigut makku erserput:

[...]

Allannguummi tassani siunertarineqarpoq killiliinermi aalajangersarneqassasoq ilaatisinnginnissami paasissutissat suut ilaatinneqarsinnaanersut, pingaartumik paasissutissat "mianernartuutillugit", tassa inuiaqatigiinni paasinnittarneq nalingin-naasoq tunngavigalugu tamanit ilisimaneqalernissaasa pinngitsoortinneqarnissaat piumasarineqartariaqarluni. Oqaasertaanik allannguinikkut ilaatisinnginnissamut aalajangersakkap atuufigisimasai annikilliallatsinneqarput.

[...]"

§ 12, imm. 1, nr. 1-imik aalajangersagaq pissutsit inuit ataasiakkaat aningaasaqarnerinut tunngasut eqqarsaatigalugit atorneqartarpooq. Piumasaqaataavorli paassisutisat pineqartup nammineq nalinginnaasumik aningaasaqarneranut tunngasuussasut tamuminngaluunniit paassisutissiuussasut. John Vogterip atuakkiaani "Offentlighedsloven med kommentarer"-mi, pingajussaanik naqitertinneqartumi (1998-imeersumi), qupperneq 221 innersuussutigaara.

Atorfekartitaasut pisortaniluunniit suliassaqartitaasut ataasiakkaat pillugit paassisutisat arlallit inummut namminermut tunngalluinnartutut paasineqarsinnaangillat, pineqartummi tassaammata pissutsit sulinermut tunngasut pillugit paassisutissat. Karsten Revsbachip allallu atuakkiaanni "Forvaltningsret, Sagsbehandling"-mi, arfineq pingajussaanik naqitertinneqartumi (2019-imeersumi), qupperneq 268 innersuussutigaara.

Kalaallit Nunaanni inatsiseqartitsinermi tunngaviup Danmarkimi inatsiseqartitsinermi siusinnerusukkut massakkullu tunngavik pingarnerusutigut assigimmagu Danmarkimi suliassaqarfimmi tassani atuakkiaasimasut innersuussutigaakka.

**3.** Kommuni qinnuigaara A-p allagaatinik paasitinneqarumalluni qinnutigisaa paasitinneqarsinnaatitaaneq pillugu inatsimmi § 2, imm. 2 imaluunniit § 12, imm. 1, nr. 1 innersuussutigalugu kommunip itigartissimanera oqaaseqaammini immikkut paassisutissiissutigeqqullugu.

Itigartitsinerup § 2, imm. 2 imaluunniit § 12, imm. 1, nr. 1 innersuussutigalugu pisimanera apeqqutaatinnagu kommuni qinnuigaara allagaatinik paasitinneqarumanermik qinnutigisap itigartinneqarnissaanik aalajangiineq pillugu nassuaateqaqqullugu. Kommuni aammattaaq qinnuigaara annertusisamik paassisutissiarnermik tunngavik maillugu allagaatinik paassisutissisoqarsinnaanersoq kommuni naliliisimanersoq paassisutissiissutigeqqullugu.

[...]"

Kommuni allakkani 1. september 2021-meersuni qinnuigaara suliami allagaatit kommunillu oqaaseqaataa uannut kingusinnerpaamik 1. oktober 2021-mi tigunesqarsimasussanngorlugit nassiuteqqullugit.

Nukingisaarutitut allakkat kommunimut 14. oktober 2021-mi nassiuppakka, alakkallu kommunimut 1. september 2021-mi nassiussimasakka eqqaasitsissutigalugit.

Piffissaliussap 1. november 2021-mut kinguartinneqarnissaanik kommunip qin-nutigisaa 20. oktober 2021-mi tiguara.

Kommunip oqaaseqaataa 3. november 2021-mi tiguara, tassanilu ilaatigut mak-ku oqaatigineqarput:

“[...]

*Aallaqqaasiut*

Ilumoorpoq allagaatinik paasitinneqarumanermik qinnutigisap itigartineqarnera paa-sissutissat paasitinneqarsinnaatitaaneq pillugu inatsimmi pineqartunut ilaannginnerat imaluunniit paasissutissat pissutsinut inuup atugaanut tunngasuunerat eqqarsaati-galugu ilaatinneqannginnerat innersuussutigalugu pisimanersoq nalornissutigineqa-laarsinnaammat, tak. tulleriinneri malillugit § 2, imm. 2 aamma § 12, imm. 1, nr. 1.

Tamanna pissutsinik arlalinnik pissuteqarpoq, matumani allagaatinik paasitinneqaru-malluni qinnutigisap aallaqqaasiutitut soraarneq pillugu isumaqatigiissummut tunnga-sooriarluni kingusinnerusukkut aningaasanut killilerneqarsimanera ilangullugu eqqar-saatigalugu. Tassani aamma ilaavoq naak qinnutigisaq aasaanerani sulinngiffeqarne-rup nalaani tunniunneqaraluartoq uanga pilertortumik akissuteqarnissaanik pingaartit-sinera. Taamaattumik naatsumik eqqortumillu akissuteqarnissaq qitiutinneqarsima-voq.

*Itigartitsinermut inatsiseqartitsinikkut tunngavigisaq*

Kommuneqarfik Sermersuup naliliinera unaavoq aningaasat (qassiusinnaasut) [B]-mut taassuma soraerneranut atatillgu tunniunneqarsimasut pillugit allagaatinik paasi-tinneqarumaneq itigartissallugu kommuni pisussaaffeqartoq.

Kommunip paasinninera unaavoq paasissutissat § 2, imm. 2 apeqquatainnagu § 2, imm. 3 inatsisikkut tunngavigalugu paasissutissiissutigineqartut nalinginnaanerusutut pissuseqartut.

[B]-lli soraernerera pillugu paasissutissat “nalinginnaanerusutut” pissuseqangillat.

Pineqartoq tassaavoq isumaqatigiissut uuttuutit arlallit isiginiarlugit isumaqatigiissuti-gineqarsimasoq. Tamanna ukioqqortussuseq il.il. tunngavigalugit soraernermet atatil-lugu nalinginnaanerusumik ajunngitsorsisitsinerup paarlattuatut isigineqassaaq.

Kommunili allagaatinik paasitinneqarumanermik paasitinneqarsinnaatitaaneq pillugu inatsimmi § 12, imm. 1, nr. 1-im aamma § 13, imm. 1, nr. 6-im malittarisassat tunngavigalugit itigartitsinnissaminut pisussaaffeqartutut imminut isigivoq.

*Paasitinneqarsinnaatitaaneq pillugu inatsimmi § 12, imm. 1, nr. 1 aamma § 13, imm. 6*

Paasitinneqarsinnaatitaaneq pillugu inatsimmi § 12, imm. 1, nr. 1-ikkut naluneqangitsutut aalajangersarneqarpoq allagaatinik paasitinneqarsinnaatitaanermi pissut-sinut ataasiakkaat inuunerannut, matumani aningaasaqarnermut tunngasut ilangullugit eqqarsaatigalugit, tunngasut pineqartunut ilaatinneqannngitsut. § 13, imm. 1, nr. 6-ikkut aalajangersarneqarpoq allagaatinik paasissutissiineq klillilerneqassasoq, tamanna ilaatigut inuit ataasiakkaat soqtigisaat pingaaruteqartut illersorniarlugit pis-sutsit immikkut issusia pissutigalugu isertuussinissaq pisariaqarpat.

Paasitinneqarsinnaatitaaneq pillugu Inatsisartut inatsisaata Inatsisartut inatsisaatigut nr. 1-ikkut, 31. maj 1999-imeersukkut § 2-mik allanngortitsiviusup Danmarkimi paasitinneqarsinnaatitaaneq pillugu inatsit 1985-imeersoq 1993-imi 1998-imilu allanguuteqartinneqartoq pingarnerusutigut assigaa.

John Vogterip atuakkiamini "Offentlighedsloven med kommentarer"-mi 1998-imeersumi quppernermi 96-imi inatsit taanna pillugu oqaaseqaatimini ilaatigut makku oqaa-tigai:

*"Paasitinneqarsinnaatitaanerli pillugu inatsimmi § 12-imi aamma § 13-imi aalaja-nersakkat atorfeqartitaasoq pillugu paasissutissat misikkarissuuusinnaasut allaga-a-tinik paasissutissiinermermi ilaatinneqartannginnissaat qulakkiissavaat, taamatuttaarlu ilimagisariaqarunarluni aalajangersakkat taakku, matumani § 13, imm. 1, nr. 6 ilan-gullugu eqqarsaatigalugu, qanoq paasineqarnissaat suliat pisortani atorfeqartita-asunut tunngasut eqqarsaatigalugit nassuarneqartarumaartoq."*

Oqaatigineqarpoq Kalaallit Nunaanni paasitinneqarsinnaatitaaneq pillugu inatsimmi § 12, imm. 1, nr. 1-ip aamma § 13, imm. 1, nr. 6-ip Danmarkimi paasitinneqarsin-naatitaaneq pillugu inatsimmi taamani atuuttumi § 12, imm.1, nr. 1 aamma § 13, imm. 1, nr. 6 assigigaat.

[B]-p soraarnermi ajunngitsorsiaasa aningaasartaasa qanoq amerlassuseqarnerat paasitinneqarsinnaatitaaneq pillugu inatsimmi pineqartunut ilaatinneqartutut isigine-qarpat Kommuneqarfik Sermersooq naliivoq allagaatink paasissutissiineq killilerne-qassasoq, paasitinneqarsinnaatitaaneq pillugu inatsimmi § 12, imm. 1, nr. 1 aamma § 13, imm. 1, nr. 6 innersuussutigalugit.

Kommunip paasinninnera unaavoq paasissutissat taakku misikkarissuuusut/isertuus-sassaasut. Tamatumani oqaatigineqarpoq aningaasat qassiunerat pillugu paasissutis-saq allagaatinik paasissutissiinermermi paasissutissiissutigineqarpat tamatuma aningaasat

tunniunneqarnerannut tunuliaqtaasoq aningaasartuutilluunniit assigiinngitsut qanoq katitigaanerat sukumiinerusumik ilisimasaqarfiginagu tusagassiuutini allaaserineq-qattaarnissaa tamanillu alapernaaserneqarnissaa qularutissaassanngitsoq.

[B]-p paasissutissat tamanut annertunerusumik soqtiginaateqanngitsutut ittut kisiisa pissutigalugit taamatut tamanit alapernaaserneqarnissaa – immikkoortillugu isigigan-ni - pissusissamisoorsorinanngilaq. Aamma tamakku pissutigalugit isumaqatigiissum-mi aalajangersarneqarpoq taanna isertuuneqassasoq.

Karnovip Danmarkimi paasitinneqarsinnaatitaaneq pillugu inatsimmi § 21, imm. 3 (akissarsianut il.il. tunngasut pillugit paasissutissiisarnermut tunngasoq) pillugu oqaa-seqaataa 112 naggassiutitut innersuussutigaara, taannalu imaattunik imaqarpoq:

"Paasissutissat imm. 3-mi taaneqartut inatsimmi pineqartunut ilaatinneqarnerat illu'ani isumaqarpoq taakku § 2-mi ilaatisinnginnissamik aalajangersagaq tunnga-vigalugu paasissutissiinermi ilaatinneqanngissinnaassanngitsut, illua'tungaanilu isumaqarluni paasissutissanik taakkuninnga paasissutissiinissamik apeqqut inat-simmi aalajangersakkat nalinginnaasut tunngavigalugit aalajangerneqassasoq. Taamaattumik paasissutissat taakku paasissutissiinermi soorlu § 30, imm. 1, nr. 1 malillugu tunngaviatigut ilaatinneqanngissinnaapput, tassuunalu aalajangersarne-qarpoq paasissutissat pissutsinut inuit ataasiakkaat atugaannut, matumanani ani/ngaasaaqarnermut tunngasut ilanngullugit eqqarsaatigalugit, tunngasut paasi-tinneqarsinnaatitaanermi pineqartunut ilaatinneqanngitsut."

#### *Annertusisamik paasissutissiisarneq*

Paasissutissat paasissutissiinermi pineqartunut ilaatinneqanngitsutut kommunip isigi-galuarai annertusisamik paasissutissiisarneq pillugu malittarisassat tunngavigalugit paasissutisiinissamut pissutissaqarnersoq allagaatinik paasitinneqarumalluni qinnuti-gisap suliarineqarnerat atatillugu isumaliutersuutigineqarsimavoq.

[B]-p nammineq aningaasaqarneranut tunngasut pineqarnerat isiginiarlugu aamma pisortat soqtigisaasa annertuut allagaatinik paasissutissiisoqannginneratigut ajoqu-serneqarnerat takuneqarsinnaanngikkaluartoq aalajangiisoqarpoq annertusisamik paasissutissiisarnermik aallaavik tunngavigalugu paasissutissiisoqassanngitsoq.

[...]" (Ombudsmandeqarfimmi nutsigaavoq)

Suliani allagaatit ilaat kommunimit 12. november 2021-mi tiguakka.

Kommuni 26. november 2021-mi qinnuigaara ilassutaasumik oqaaseqaat aamma soraarnermi isumaqatigiissutip B-mut isumaqatigiissutigineqarsimasup assilinera uannut nassiuteqqullugit. Makku ilaatigut oqaatigaakka:

“[...]

1. Kommuni oqaaseqaat tunngavigalugu qinnuigaara kommunip [B]-p soraarneq pillugu isumaqatigiissutigisimasaat uanut nassiuteqqullugu, isumaqatigiissutip imarisaa uanga paasinninnera malillugu pisortat ingerlatsinerat pillugu paasitinnejqarsinnaatiataaneq pillugu Inatsisartut inatsisaanni nr. 8-mi, 13. juni 1994-meersumi (matuma kingornatigut paasitinnejqarsinnaatitaaneq pillugu inatsimmik taaneqartartussami) kingersinnerusukkut allanguuteqartinneqarsimasumi paasissutissiinermi ilaatsinnginnissamik aalajangersakkani pineqartunut ilaatinnejqarnersoq naliliinissannut periarfisaqarsinnaaqquellunga.
2. Kommuni aammattaaq qinnuigaara [A]-p allagaatinik paasitinnejqarumalluni qinnutigisaanik 28. juni 2021-meersumik itigartitsinermut kommunip tunngavilersuutaa itsileqqullugu.

Kommunip itigartitsineq paasitinnejqarsinnaatitaaneq pillugu inatsimmi § 2, imm. 2 aamma 3, § 12, imm. 1, nr. 1 imaluunniit § 13, imm. 1. nr. 6 innersuussutigalugit tunngavilersorneraa oqaaseqaammi 3. november 2021-mi tiguneqartumi erseqqissumik takuneqarsinnaanngilaq.

Kommuni qinnuigaara aalajangersagaq suna allagaatinik paasitinnejqarumanermik itigartitsinermut tunngaviunersoq immikkut innersuussutigeqqullugu. Kommuni tamatumunga atatillugu soraarneq pillugu isumaqatigiissummi pissutsit sorpiaat allagaatinik paasitinnejqarumanermik itigartitsinermut tunngavilersuutigineqarnerat pillugu immikkut nassuaateeqaqqullugu.

[...]"

Kommuni allakkani 26. oktober 2021-meersuni qinnuigaara soraarnermi isumaqatigiissutip assilinera kommunillu ilassutaasumik oqaaseqaataa uannut kingu-sinnerpaamik 26. december 2021-mi nassiuteqqullugu.

Nukingisaarut kommunimut 14. januar 2022-mi nassiuuppara, allakkallu kommunimut 26. november 2021-mi nassiusakka eqqaasitsissutigalugit.

Oqaaseqaat 3. november 2021-meersoq kommunip 14. januar 2022-mi nassiu-teqqippaa.

Nukingisaarut kommunimut tamanna tunngavigalugu 17. januar 2022-mi nasiuppara, kommunilu tassani qinnuigalugu soraarnermi isumaqatigiissutip assilinera kommunillu ilassutaasumik oqaaseqaataa nassiuteqqullugit, oqaaseqaallu 3. november 2021-meersoq tigoreeersimagigiga innersuussutigalugu.

Kommuni suli ataasiarlunga 15. februar 2022-mi nukingisaaqqippa, tassanilu suliap ingerlasimanera nassuiarpala kommunilu qinnuigalugu soraarnermi isumaqatigiissutip assilinera kommunillu ilassutaasumik oqaaseqaataa nassiuteqqullugit.

Soraarnermi isumaqatigiissutip assilinera ilassutaasumillu oqaaseqaat 16. februar 2022-mi tiguakka. Kommunip oqaaseqaammi ilaatigut makku oqaatigai:

"[...]

### **Kommunip [B]-llu soraarneq pillugu isumaqatigiissutigisimasaannik nassius-sineq**

Aallaqqaasiutitut oqaatigineqarpoq [A]-p allagaatinik paasitinneqarumalluni qinnutigisa aningasat [B]-mut taassuma kommunimi atorfimminit soraarneranut atatillugu tunniunneqartut pillugit paasissutissamut killilerneqarmat.

Qinnutigisap aningasat tunniunneqartut pillugit paasissutissamut killilerneqarnera paasinninneqarsinnaatitaaneq pillugu inatsimmi § 2, imm. 3-mut naapertuuttuusutut nalilerneqarpoq.

Ataqatigiinneqarnermi tassani Steen Rønsholtip atuakkiaani "Forvaltningsret, Proces, Sagsbehandling"-imi 2018-imeersumi qupperneq 28 assersuutitut innersuussutigineqarsinnaavoq, tassanilu atuakkiortup Danmarkimi paasitinneqarsinnaatitaaneq píllugu inatsimmi § 21, imm. 2 Kalaalit Nunaanni inatsimmi aalajangersakkap assigisaa pillugu makku oqaatigai:

*"Pissutsit akissarsianut tunngasut pillugit paasissutissani – tunngaviusumik akissarsiat paasissutigineqarnerisa saniatigut – paasissutissat qaangiuttoornersianut, piuk-kunnaateqarnermut sulinermilu akissarsianut kiisalu soraarnermi ajunngitsorsianut soraarnerussutisianullu tunngasut pineqartunut aamma ilaatinneqarput. Paasitinneqarsinnaatitaanermi taamaallaat akissarsiat amerlassusii suussusiilu pineqartunut ilaatinneqarput, tunniussinermulli tunngaviusoq pillugu paasissutissat erseqqinerusut – matumanit soorlu soraarnermi ajunngitsorsiat pillugit isumaqatigiissuteqarneq ilanngullugu eqqarsaatigalugu – aalajangersakkami pineqartunut ilaatinneqarrik."*

Tamanna innersuussutigalugu [A]-llu naammagittaalliuutaata aningaasat amerlassusiannut ilumut killilerneqarsimanera innersuussutigalugu kommunip manna aallavittut paasiuminaatsippaa, tassalu soraarnermi isumaqatigiissutip assilinera Ombudsmandip piumasimagaa, isumaqatigiissutip imaa allagaatinik paassisutissiinermi ilaittisangannginnej pillugu aalajangersakkani pineqartunut ilaatinneqarnersoq naliliisoqarnissaa siunertaralugu.

Soraarnermi isumaqatigiissut Ombudsmandi pillugu inatsimmi § 18, imm. 1 innersuussutigalugu kakkiallu nassiunneqarpoq, nassuerutigineqarmammi kommuni Ombudsmandip isumaqatigiissummik tunniusseqqusinera naalassallugu pisussaaffeqartoq.

### **[A]-p allagaatinik paasitinneqarumalluni qinnutigisaanik itigartitsinermut kommunip tunngavilersuutaanik itisiliineq**

Eqqortussaq anguniarlugu oqaatigineqarpoq Ombudsmandip allagaani 26. november 2021-meersuni [A]-p allagaatinik paasitinneqarumalluni qinnutigisaa 28. juni 2021-meersoq innersuussutigineqartoq. Eqqortoq unaavoq [A]-p allagaatinik paasitinneqarumalluni qinnutigisaa 28. juli 2021-meersuusoq.

Kommunip naliliinera unaavoq [B]-p pisumi pineqartumi soraarnermut atatillugu ajungitsorsiaasa aningaasartaasa qassiunerannik paasisutissaq paasitinneqarsinnaatiataaneq pillugu inatsimmi § 2, imm. 3-mi pineqartunut ilaanngitsoq, tassunalu aalajangersarneqarpoq *ateq, ilinniarsimasaq, akissarsianut tunngasut aamma sulinermut atatillugu angalasarsimancerit* pillugit paasisutissat paasisutissiissutigineqarsinnaatitasasut.

Kommunip naliliinera unaavoq paasisutissat pineqartut nalinginnaanerusumik pissuseqartut, taamaattumillu inuit ataasiakkaat aningaasaqarnerannut tunngasut (misikkarissut/isertuussassat) pillugit paasisutissanut attuumassuteqaratik. Pisortani atorfekartitaasup isumaqatigiissut atuuttoq il.il. tunngavigalugit qanoq akissarsiaqarnera pillugu paasisutissaq paasisutissaagunangilaq misikkarissoq/isertuussassaq.

Kommunilli soraarneq pillugu pisumi isumaqatigiissummi soraarsitsiniarluni suliap ingerlalereerfigisimasaanut ilaasumi ajunngitsorsiat aningaasartaasa qassiunerat pillugu paasisutissaq nalinginnaasutut pissuseqanngimmat § 2, imm. 3-mi pineqartunut ilaanngitsutut isigigaa.

Pisortat ingerlatsinerat pillugu paasitinneqarsinnaatitaaneq pillugu Inatsisartut inatsisaata allanngortinneqarneranik Inatsisartut inatsisaata nr. 1-ip, 31. maj 1999-imeersup (sulisorineqartut pillugit paasisutissanik paasitinneqarsinnaermet tunngasup)

piareersarlugu suliarineqarnera suliaasimasut tamatumunnga atatillugu innersuussutigineqarput, tassaniulu ilaatigut makku oqaatigineqarput:

*"Aalajangersagaq taanna malillugu siullermik paasissutissat "nalinginnaanerusut" arlallit inatsimmi pineqartunut ilaatinneqarput. Tassani pineqartut tassaapput atorfekartup aqqa, atorfia, ilinniagaqarnera, suliarisartagai, akissarsiaanut tunngasut sulinermullu atatillugu angalarneri pillugit paasissutissat."*

Soraarnermi ajunngitsorsiat "akissarsianut tunngasuni" pineqartunut ilaatinneqartut piarersaalluni suliani kingusinnerusukkut oqaatigineqarnera kommunip eqqumaffigaa. Kommunili naliivoq tamanna taamaallaat atuuttoq soraarnermi ajunngitsorsiat aamma "nalinginnaasutut pissuseqarpata". Taamaattumik kommunip paasissutissat § 2, imm. 2-mi pineqartunut ilaatinneqartutut isigai.

### **Paasitinneqarsinnaatitaaneq pillugu inatsit atuuppat**

Pisumi matumanisut ittumi soraarnermi ajunngitsorsiat amerlassusiat pillugu pasissutissaq paasitinneqarsinnaatitaaneq pillugu inatsimmi pineqartunut ilaatinneqartoq paasinarsippat kommuni allagaatinik paasitinneqarumalluni qinnutigisaq itigartissallugu pisusaaffeqarpoq, paasitinneqarsinnaatitaaneq pillugu inatsimmi § 12, imm. 1, nr. 1 imaattunik oqaasertaqartoq innersuussutigalugu:

"Paasitinneqarsinnaatitaanermi paasissutissat makku ilaatinneqanngillat:

1) inuit ataasiakkaat inuuneri pillugit paasissutissat, matumani aningaasaqarneran-  
nut tunngasut ilanngullugit, ..."

Aalajangersakkap taassuma Danmarkimi paasitinneqarsinnaatitaaneq pillugu inatsimi § 30, imm. 1, nr. 1 assigaa. Aalajangersagaq taanna pillugu oqaaseqaatit Karnovi-  
miittut ilaatigut imaapput:

*"Paasissutissat sorliit "pissutsinut namminerisanut" tunngasutut isigineqarnerannik naliliinermi paasissutissat pissusertik pissutigalugu inuiaqatigiinni nalinginnaasumik paasinnittaaseq malillugu tamanit ilisimaneqalinnginnissaat piumasqaatigineqarsin-  
naanersoq aallaavigineqartariaqarpoq. Taamaalilluni imaanngilaq pisumi paasissu-  
tissat suullunniit pissutsinut inuup pineqartup atugaanut tunngasut aalajanger-  
sagaq taanna inatsisikkut tunngavigaugu ilaatinneqanngissinnaasut. Paasissutissaq  
allagaatinik paasissutissiinermi ilaatinneqanngissinnaanersoq naliliinermi paasis-  
sutissaq pineqartoq ataatsimut isiginninneq aallaavigalugu qanoq pissuseqarnerni  
tunngavigalugu pissutsit inuup pineqartup nammineq atugai, matumani aningaa-  
saqarnermut tunngasut ilanngullugit eqqarsaatigalugit, pillugit paasissutissanut  
tunngasuunersoq taamaalilluni aalajangiisuuvvoq."*

Kommunip naliliinera unaavoq pisumi pineqartumi soraarnermi ajunngitsorsiat aningasartaasa qassiunerat pillugu paasissutissaasoq [B]-p nammineq aningaasaqarneranut tunngasoq.

Soraarnermi ajunngitsorsiat pisumi soraarsitsinermik inernilerneqarsinnaasumi isumaqtigiinniutigineqartut qassiunerat pillugu paasissutissaq paasissutissaavoq nalinginnaasuunngitsoq, pissutsinut inuup pineqartup atugaanut aningaasaqarneranullu erseqqissumik atanilerneqarsinnaanngitsoq.

Isumaliutersuutit taakku aningaasat qassiunerannik paasissutissaq isertuunneqassasoq kommunip [B]-llu soraarneq pillugu isumaqtigliissummi aalajangersakkamik ilangussisimanerannut tunngaviupput. Oqartussaasup isertuussisoqarnissaanik ki-naassutsilluunniit isertuunneqarnissaanik nalinginnaasutigut neriorsuisinnaannginnea, neriorsuisimanerlu innersuussutigalugu neriorsuinerup qanoq annertutiginera pillugu paasitinneqarumanemik itigartitsissutiginnissinnaannginnera kommunip eqqumafigaa. Pisumili pineqartumi isertuussinissamik neriorsuisimaneq (annertungaatsiar-tumik) pingaruteqartillugu isiginiarneqartariaqarpoq.

Kommunip paasinninnera aamma unaavoq paasissutissat pisumi pineqartumi paasitin-neqarsinnaatitaaneq pillugu inatsimmi § 13, imm. 1, nr. 6-imi imaattunik oqaaser-taqartumi pineqartunut ilaatinneqartut:

*"Paasitinneqarsinnaatitaaneq killilerneqarsinnaavoq, tamanna pisariaqarpat makku immikkut eqqarsaatigineqarnissaasa illersorneqarnissaannut:*

*6) namminersortut pisortallu soqutigisaat, pineqartup pissusia immikkut ittoq pissutigalugu isertuussinissaq pisariaqarpat."*

Aalajangersakkap oqaasertalerneqarnerata manna nassataraa, tassalu paasissutissa-nik ilaatisinnginneq taamaallaat pisumi naliliinikkut pisinnaasoq. § 13, imm. 1, nr. 6 tunngavigalugu naliliineq tassuuna ilaatisinnginnernit paasissutissanut allagaatinullu aalajangersimasunut tunngasunit allaaneruvoq.

Kommunip naliliinera unaavoq suliami pineqartumi soraarnermi ajunngitsorsiat aningasartaasa qassiunerannik paasissutissap tamanut saqqummiunneqarnera naleqqut-tuunngitsoq pitsaasuuunani. Kommuni pisumi pineqartumi [B]-p aviisitigut eqqartor-neqareersimanera isiginiarlugu naliliivoq paasissutissat innuttaasuni aalassassimaar-nermik [B] eqqarsaatigalugu pitsaanngitsumik pilersitsisinnaasut.

Ataqatigiinneqarnermi tassani Kalaallit Nunaanni innuttaasut ikittunnguunerat Kalaallillu Nunaanni pingaartumillu Nuummi innuttaasut amerlanersaasa [B]-p kinaaneranik

ilisimasaqarnerisa ilisimasaqarnissaasaluunniit ilimagisariaqarnerat isiginiarneqarta-riaqarpoq.

### **Aalajangersagaq suna allagaatinik paasitinneqarumanermik itigartitsinermut tunngaviuva**

Qulaani oqaatigineqartunit ertutut Kommuneqarfik Sermersuup naliliinera unaavoq pisumi soraarnermi ajunngitsorsiat soraarsiniarnerup ingerlalereerfiani isumaqatigiinniutigineqarsimasut pillugit paassisutissaq paasitinneqarsinnaatitaaneq pillugu inatsimmi pineqartunut ilaasutut isigineqarsinnaanngitsoq, paassisutissarmi taanna § 2, imm. 3-mi pineqartunut ilaatinneqanngimmat.

Kommunilli tamatumunnga peqatigitillugu naliliinera unaavoq paassisutissat paasitin-neqarsinnaatitaaneq pillugu inatsimmi pineqartunut ilaasutut isigineqarunik paasitin-neqarsinnaatitaaneq pillugu inatsimmi § 12 paassisutissiinermi paassisutissanik/allagaatinik aalajangersimasunik ilaatisinnginnissamut tunngaviusoq aamma § 13 paassisutissanik, pisumi pineqartumi tamanna ilaatigut namminersortut soqtigisaat pingaaruteqartut mianerineqarnissaat eqqarsaatigalugit pisariaqarpat, allagaatinik paassisutissiinermi ilaatisinnginnissamut tunngaviusoq tunngavigalugit ilaatinneqanngis-sinnaallutillu ilaatinneqanngitsussaasut.

-----0-----

Illassutaasumik nassuaat manna kommunip nassuaataanut 3. november 2021-meersumut ataneqarteqqissaarlugu isigineqassaaq." (Ombudsmandeqarfimmi nutsigavoq)